

Cu presentacion di buki "Historia di Faro na Westpunt"

Minister Michelle Hooyboer-Winklaar cu elogio pa bunita iniciativa di Romulo Fingal

ORANJESTAD (AAN): Romulo Fingal tin un relacion sentimental hopi special cu California Lighthouse, nos faro na Westpunt. Como yiu di e ultimo vuurtorenwachter,

el a realisa cu su edad ta subiendole y no tin hende mas pa conta e storia di e faro.

E ta conta cu e mes no por a kere cu e a skirbi un buki, pero na momento cu el a


cuminsa pone su recuerdo nan riba papel el a bay bon y ta contento di por a realisa e buki "Historia di Faro na Westpunt".

Cu asistencia di UNOCA, Romulo Fingal a lansa su buki e siman aki, para na e luga asina special pa cultura y historia di nos isla y unda cu recuerdonan di su infancia y hubentud a worde crea.

Minister Michelle Hooyboer-Winklaar a expresa cu ta un honor y placer pa e ta presente na un ocasion asina special, cual ta hiba e preservacion di Aruba su historia oral na e siguiente nivel. Ademas, e mandatario encarga cu Asuntonan Economico, Asuntonan Social y Cultura a comparti cu e lansamento di Romulo Fingal su buki ta un bon momento pa cuminsa concretisa e plannan pa restaura e faro.

E faro ta considera un di e monumentonan mas bishita pa nos turistanan, como tambe nos comunidad y e ta un di e luganan mas fotografia na Aruba. Ta e deseo di Minister Hooyboer-Winklaar pa wak e faro restaura y pa nos comunidad y turistanan por disfruta di dje mas, cu nan por pasa paden y wak con e ta traha y disfruta di e bista for di su bentananan.

Yega na wak e restauracion di e Faro di Westpunt realisa ta un anhelo grandi di Romulo Fingal. El a splica cu ta papiando caba pa traduci su buki na e idioma Ingles y Spaño, como tambe Hulandes y cu loke resulta di e benta lo bay pa Fondo di Monumento



pa contribui na e mantencion di e monumento aki despues di su restauracion.

Minister Hooyboer-Winklaar a menciona e simbolismo di un faro/lighthouse/vuurtoren, cual ta iluminacion y cu esaki speranza y guia; y cu nos Faro di Westpunt mester sirbi como simbolo di iluminacion, inspiracion y vision pa preservacion di nos cultura y cultura historico.

Romulo Fingal ta encurasha otro personanan cu a pasa den hopi cos durante nan bida y particularmente nan hubentud pa pone esakinan riba papel pa comparti esaki cu nos comunidad, specialmente "basta bo a biba y haci yen cos di mala mucha", el a bisa hariendo.

Minister Hooyboer-Winklaar a felicita Romulo Fingal cu e bunita buki cu ta duna un tiki di nos historia for di perspectiva di un persona cu a biba banda di e faro y cu su famia a hunga un rol asina importante den e cuida di e faro y nabegantenan den nos awanan teritorial.

E buki aki sumamente inte-



resante y valioso y ta duna un bista den un parti di nos historia; e por worde uza na nos schoolnan y ta pas bunita den e proyecto pa preservacion di historia oral di Aruba.

A cuminsa cu e proyecto di preservacion di nos historia oral y ta di aplaudi cu un persona manera sr. Fingal a hiba esaki na e siguiente nivel, Minister Hooyboer-Winklaar a expresa. El a añadi cu e ta spera cu e buki di sr. Fingal lo sirbi como inspiracion pa otronan tambe contribui na e cultura di Aruba y herencia cultural na un forma asina y ofrece obranan na Papiamentu, cual banda di nos obranan literario ta ofrece un bista den bida na Aruba.

